



A LA ROYNE REGENTE,
ET A NOSSEIGNEURS LES PRINCES,
& Seigneurs du Conseil.

MADAME,
l'Vniuersité de Paris remon-
stre en toute humilité à vo-
stre Majesté, que la doctrine du mas-
sacre des Roys par assassins, qui par
pieté se deuoiuent à la mort, com-
me à vn Martyre agreable à Dieu,
est vne engeance pestifere non iamais
veuë ny leüe dans tous les memoires
de l'antiquité : Ni les Payens, ny les
Chrestiens ne l'ont iamais cogneüe.
Entre les Mahometans vn seul appelé
le vieil de la Montagne s'en est serui,
mais les autres de la mesme secte la
suffoquerent aussi tost, & oncques puis
ils ne s'en sont seruis, bien que leur hai-
né contre les Roys Chrestiens ne soit

pas diminuée; Depuis soixante ans seulement ou environ, ceste peste s'est semée dans le Christianisme & pratiquée en Angleterre & en France. Nous disons en Angleterre, d'autât que pour l'obeissance ciuile & temporelle des Roys & pour la seureté de leurs vies, tous Roys Chrestiens, Payens, heretiques, idolastres, infidelles, Excommuniez, apostats, nous sont saincts & sacrez, ainsi que les Apostres l'enseignent, & l'ancienne Eglise Chrestienne, & l'exemple des Saincts de Paradis, qui ont esté Prelats & Euesques de France. Or ceste doctrine infernale s'est appuyée & fondée sur vne autre doctrine erronée, qui est de la toute puissance du Pape, que nous reconnissons chef de l'Eglise, en la façon que nos ancestres l'ont recogneu. La doctrine de ceste toute puissance ne se trouue point dans les escrits de la Theologie de Paris, ny dans le sein de l'Uni-

uerfité, ains elle se trouue dans les sermons & escrits des Iesuites, & dans les responses des assassins, quand ils sont interrogez par les Iuges. Pour s'asseurer de cela il les faut ouyr parler. Parrey qui entreprit d'assassiner la Royne d'Angleterre, dit qu'il le pouuoit faire, parce qu'elle estoit excommuniée par le Pape, & que partant sa vie estoit abandonnée. Catesby entrepreneur de ceste fougade qui deuoit enlèuer le Roy de la grand Bretagne, la Royne, ses enfans & les Estats d'Angleterre, a respondu que cest entreprise estoit saincte : car puis que Clement huitiesme auoit defendu par deux brefs de le receuoir, à plus forte raison, vouloit il qu'estant receu il fust osté de son siege. Iean Chastel dit qu'il estoit meritoire de tuer le feu Roy, pource qu'encor que les Euesques de France l'eussent receu & mis en l'Eglise, toutesfois il n'y estoit point, le Pape ne l'ayant point receu.

Rauaillac le dernier assassin dit que le Roy faisoit la guerre contre la volonté du Pape, que Dieu estoit le Pape, & le Pape estoit Dieu par ces paroles, Tu es Pierre, & sur ceste pierre &c. En consequence de cela, l'Euesque de Clermont leur disciple, ne faillit apres le supplice du meurtrier, de se trouuer à l'assemblée de Sorbone, qui se faisoit à l'imitation de nos ancestres, pour la condamnation de la doctrine des assassins, où allant par toutes les bandes auant que les Docteurs fussent assis, il leur disoit, Prenez garde à ce que vous faites, vous auez icy deux Nonces Apostolicques: & la compagnie ayant pris place, il opina que la question qui se presentoit, auoit esté traittee diuersement, & qu'il estoit besoin d'en parler aux Nonces, qui en rescriroient au Pape: comme si autres Rois ne deuoient viure que ceux qu'il plairoit au Pape. Apres que plusieurs bons prescheurs

de ceste Vniuersité eurent detesté les meurtres des Roys & les fauteurs de ceste doctrine, en fin P. Coton vous presenta, Madame, vne lettre déclaratoire de la doctrine des Iesuites en ceste matiere, delaquelle il a voulu contenter tous ceux qui le plaignoient que leurs escrits establissent trop ces trois doctrines proches & voisins, la toute puissance des Papes, & en consequence d'icelle, la rebellion contre les Roys, & l'abandonnement de leurs vies, lors que telles gens veulent les surnommer ou estimer tyrans. Beaucoup de gens d'entendement recognoissent assez les equiuoques & fallaces dont il couure & cache sa mauuaise doctrine, suiuant l'usage dont sa secte fait profession par traictez exprez approuuez par le general, comme on voit en l'Apologie de Henry Garnet, au chapitre des equiuoquations. Nous serions pourtant bien marris de les decouurir, & d'em-

Lettre de l'uniuersité de Paris En sa Roynie Contre
pescher que sa faulse monnoye n'eust
cours pour quelque bien qui en peut
reuenir: Mais puis que par le merite de
ses fallaces, la secte veut gagner ce
point que d'enseigner la ieunesse en
l'Vniuersité de Paris, contre la volonté
constante & determinée du feu Roy
ceste Vniuersité fille des Roys de
France, se sentiroit coupable d'infide-
lité si elle ne vous decouuroit ces falla-
ces, & si elle ne supplioit vostre Maje-
sté de ne vouloir permettre que ceste
fille très-fidelle aux Rois, tant que l'on
ne la laisse corrompre & forcer, ne soit
point corrompue par la compagnie
d'une secte ja tant esprouuée, tres per-
nicieuse aux Roys. Il vous dit donc
Madame, que les auteurs de son or-
dre disent qu'il ne faut pas tuer vn ty-
ran, mais les auteurs par luy alleguez,
& sur tout Valentia, leur dernier
grand Docteur, y apporte vne limita-
tion telle, Si ce n'est, dit il, par iuge-

ment public: Or à fin que vous ne doutiez point, qu'elle est ceste autorité publique, il vous couche par après des articles de leur doctrine sur l'autorité des Roys en ceste façon; Que la Monarchie est le gouvernement le meilleur, que le Pape est Monarque en l'Eglise pour le gouvernement spirituel, & le Roy en son Royaume pour le temporel: ne voulant point que le Roy soit Roy en son Royaume, si le Pape n'est Monarque, & n'a puissance absolüe au gouvernement spirituel de l'Eglise: Mais, Madame, c'est chose du tout contraire à la doctrine de l'Eglise, laquelle vostre Vniuersité de Paris a tousiours maintenuë, que le Pape ait en l'Eglise vne puissance Monarchique: car se sont choses contraires que le Concile soit par dessus le Pape, comme vostre Vniuersité l'a tousiours defendu, & que le Pape soit Monarque absolu en l'Eglise. La doctrine de vo-

stre Vniuersité, si autresfois elle fut nécessaire, elle l'est maintenant plus que iamais, & au Roy & à tous les Royaumes de la Chrestienté.

Quels sont les effets de cette Monarchie spirituelle absolüe, il vous le dit bien clairement en vn autre livre qu'il presente à vostre Maiesté, Madame, & à vous Nosseigneurs les Princes, & Seigneurs du Conseil du Roy; C'est à la fin du second tome de son institution, en la question 35. où il dit que le Pape n'a point de puissance absolüe d'oster & donner les Couronnes & Royaumes des Roys. Toute sa fallace est en ce mot (absoluë) car il dit: qu'il a puissance d'oster & donner les Couronnes des Roys, mais qu'il ne l'a pas absolüe. Le Roy, & vostre Maiesté, Madame, & vous, Nosseigneurs, ne pretendez pas aussi une puissance absolüe de donner & oster les biens à vos subjets, ains seulement par la raison de la Iustice.

Aussi

Aussi dit P. Coton peu après, que le¹²⁵
Pape en vertu de son gouvernement
spirituel & pour la conionction de la
religiō & de l'estat, du spirituel & tem-
porel, peut en vertu de ses censures
conioinctement disposer des Couron-
nes des Roys, pour la religion, pour le
seruice de Dieu, pour le bien de l'Egli-
se & pour le salut des ames : & cela ne
luy est point vne doctrine particuliere,
ains elle est commune à toute sa secte.
Or ceste doctrine de la conionction
qu'il dit estre entre la religion & l'estat,
le spirituel & le temporel, est du tout
contraire à la doctrine de nostre Sei-
gneur IESVS CHRIST, qui a mis pour
iamais vne separation grande entre la
religion & l'estat, en disant : Rendez à
Dieu ce qui est à Dieu, assauoir la reli-
gion & à Cæsar ce qui est à Cæsar, as-
sauoir l'obeissance ciuile & temporel-
le, l'honneur, le service & le tribut.
Vostre Vniuersité de Paris, Madame,

l'a tousiours ainsi enseigné, se tenant
aux anciens Conciles, reiettant les nou-
ueaux, en ce qu'ils ont contreuenue à
cette saine doctrine. Et c'est en quoy
les Roys, les Euesques de la France, les
Parlemens, les Conseils du Roy, les
Docteurs François, & vostre Vniuersi-
té, ont tousiours dit consister la liber-
té de l'Eglise Gallicane & du Roiaume
de France. Il n'est pas en cela question
de peu, il n'y va que de l'Estat du Roy,
que ces hommes disent que le Pape luy
peut oster: ces hommes, dis-je, à qui
l'on fie aujourd'ui l'institution de la
ieunesse par toutes les villes, les con-
sciéces du peuple aux confessions, l'in-
stitution & l'enseignement des grands
& des petits. Il y va encore de la vie du
Roy, & de la vostre, Madame, car quād
le Pape a osté à vn Prince le droit de re-
gner, ils le tiennent pour vn tyran, qui
occupe vn estat contre le iugement de
cette authorité publicque, qui peut par

la doctrine des Iesuites faire d'un Roy, ¹²⁶
vn tyran. Et si disent bien encor que les
subiets se peuuent esleuer contre leur
Prince, ores qu'il ne soit pas excommu-
nié, s'ils croyent que par la crainte de sa
puissance on ne l'ose excommunier.
Telle est la decision du Iesuite Suares,
qui met par la l'estat & la vie de tous les
puissans Princes en une merueilleuse
incertitude. Telle est aussi la pratique
de quelques assassins des Roys, gens qui
reconnoissent la toute puissance du Pa-
pe, enseignée par les Iesuites & qui
n'en recognoissent point d'autre, sinon
autant qu'il plaist au Pape. Et telle est
manifestement la pratique du dernier
assassin, comme il apparoissoit par ses
discours execrables avec les Theolo-
giens qui lui furent enuoiez, ausquels
il se monstroit parfaitement instruit
en toutes les cauillations & fallaces dõt
la sophistique vse en ceste matiere, luy
qui leur paroissoit & estoit vrayement

& parfaitement ignorant en toute autre chose.

Nous ne doutons pas, Madame, que le Pape bien conseillé ne face son de-
voir en damnant par vne bulle aux pei-
nes infernales tels meurtriers & assas-
sins, & faisant cesser par vne seule paro-
le, comme il peut, ces grands maux qui
font honte & opprobre à l'innocence
de la religion Chrestienne. Car iusques
icy le pouuoir de telles gens à Rome a
donné occasion à quelques vns de di-
re, que qui n'empesche & ne preuient
pas les crimes commis par ceux sur les-
quels il a toute puissance, & qu'il peut
faire cesser par vne si facile condamna-
tion, il en est luy mesme l'autheur, ainsi
qu'enseignent les regles de la Iustice.

Le pretexte que prend P. Coton du
bien de l'Eglise, pour donner puissance
au Pape d'oster & donner les Couron-
nes, est une fausse couleur: Car par la
mesme separation que nostre Seigneur

IESVS CHRIST a fait pour iamais de¹²⁷
la religion & de l'estat par toute la terre où il veut que la foy soit preschée, nous sommes tenus nonobstant toutes cëlures Ecclesiastiques, interdictiōs, dispenses de serment de fidelité, commandemens du pape de nous esleuer contre nos Roys, de leur tendre toute obeissance ciuile & temporelle, & pour la defence de leurs vies, exposer la nostre propre. Cela est vne loy naturelle, escrite au cœur des hommes dès lors qu'ils viennent en ce monde, que le Fils de Dieu prenant chair humaine a cōfirmée & consacrée, obligeant à l'observation d'icelle les Chrestiens plus estroitement que n'estoient les Payens, par la seule lumiere naturelle, & les prestres plus que les laiques à qui ils doivent enseigner ceste saine doctrine, & par parole & par exemple, plus aussi les Euesques que les prestres, & plus encor le premier des Euesques que

tous les autres, pource qu'il doit en cela plus d'exemple aux Chrestiens que tous les autres pasteurs de l'Eglise. C'est aussi pourquoy le Roy de la grande Bretagne pour se garantir de tels assassins, a esté contrainct de demander à ses suiects vn serment de fidelité pour son obeissance ciuile & temporelle, & pour la seureté de sa vie, nonobstant toutes censures papales.

Serment que la doctrine & la fréquence des assassins rend aujourd'huy nécessaire par toute la Chrestienté, pour asseurer l'estat & la vie des Oincts de Dieu, & pour decharger la religion Catholique Apostolique & Romaine enuers les Roys & Princes de la terre, du blasme & de la haine que luy procure ceste mauuaise doctrine, & pour la rendre encor plus digne de faueur enuers les Princes qui tiennent religion differente. Mais encor plus en France qu'en tout autre pays ceste

saine doctrine & necessaire, puis que les effects de la contraire tombent principalement sur la vie de nos Roys & sur la Couronne de France. Et plus encor sous le bas aage de nostre Roy que lors de sa maiorité, la fausse doctrine doit estre combatuë, & les fauteurs d'icelle reietez, pour ce que la pratique du passé a tousiours enseigné que quand l'on veut employer les censures contre le temporel des Roys, l'on n'excommunie que les plus foibles.

A ces causes, Madame, l'Vniuersité de Paris fille des Roys de France supplie tres-humblement vostre Maiesté, & vous Nosseigneurs les princes & Seigneurs du Cōseil du Roy, de ne vouloir permettre que les Iesuites ayāt vne doctrine sur la toute puissance du pape, sur la seureté de l'estat des Roys & de leurs vies, contraire à la saine doctrine que l'Vniuersité a tousiours maintenüë, instruisent aux lettres la ieunesse à

Remonstrance de l'uniuersité a la 16^e Royne Contre les J^uites

Paris: moins encor qu'ils soient associez
au corps de l'Vniuersité, pour rendre la
doctrinne & les mœurs d'icelle aussi cō-
traires à l'estat des Roys comme est leur
secte, ainsi qu'il se voit par les escrits que
P. Coton vous adresse & vous donne
tous les iours en leur nom, & par l'ex-
perience qui s'en est faite & s'en fait en-
cor en plusieurs endroits de la Chre-
stienté: & l'Vniuersité priera Dieu pour
la conseruation & prosperité du Roy,
de vostre Maiesté, Madame, & de vous
Nosseigneurs les princes & Seigneurs
du Conseil du Roy.